

Tecla Kelly:

No laga ningun hende dañá bo beis den Carnaval 56



ORANJESTAD (AAN); Siman pasa, Tecla Kelly a duna un discurso na ocasion di e celebracion di un solo dia, pa cu apertura di Carnaval 56.

Segun Kelly, pe tabata un placer como presidente di e fundacion cu tin na su encargo pa coordina tur locual ta e celebracion cultural mas grandi cu Pais Aruba ta celebra anualmente esta nos Dushi Carnaval pa ricibi boso tur awe mainta na e celebracion di apertura di e temporada di Carnaval nr 56. SAC como un fundacion sin fin ni lucro ta trahando cu su miembronan voluntario pa añas na e bienestar di Carnaval di Aruba. SAC ta logra pa medio di su actividadnan durante temporada di Carnaval su fondonan pa asina cubri gastonan cu Carnaval ta hiba cu ne. Pues tur su actividad caminda cu ta paga entrada ta fundraising pa yega na SAC su fondonan.

Tin hende ta pensa pa kico SAC tey, pa cu esaki mester bisa cu tur caminda mester por tin un órgano of hende cu por dirigi e situacion pa asina no laga tur cos los pa tur hende haci loke nan kier caminda cu lo por bira un free for all cu lo por tin su consecuencianan pisa.

Carnaval ta un periodo den aña caminda cu pa yega na dje ta tuma hopi tempo di preparacion.

E ta parse algo facil, pero e tin asina tanto konopi cu mester ser kita pa asina yega na e resultado final caminda cu tur hende por goza di dje. Complace, nunca por complace tur hende, pero e resultado final ta conta. Carnaval no conoce discriminacion pues no tin

diferencia den raza, religion, color, sexo etc. Carnaval ta pa tur hende.

Si repasa Carnaval 55 den corto.: Carnaval 55 tabata tin su preocupacion ya cu tabata tin pensamento cu e a bira un di e Carnaval caminda cu e crisis mundial a haci su efecto riba dje. Esaki tabata e fenomeno cu tabata hunga un rol den tur e Carnavalnan di mundo. Pero na final mester bisa cu e na Aruba nos a keda sorprendi y a kibra tur expectativa ya cu e tabata grandi y luhoso. Un cantidad di creatividad y fantasia a keda demostra. E tabata un teatro luhoso riba caminda. SAC tambe a conoce otro obstaculonan pero manera un fundacion solido a hala faha mara y a usa tur e piedranan y barancanan cu SAC a haya den su caminda pa usanan pa

construi e trapi di exito pa asina Aruba por a wak e bunita resultado riba caminda. Esaki tabata danki na e cooperacion y animo di cada lider di grupo y cada participante individual cu ta haci posibel pa Aruba por disfruta di un tremendo Carnaval.

Financieramente e tabata un aña hopi dificil pa SAC pero esaki tabata un momento di siña con pa atende den un situacion caminda cu bo mesun hendenan ta tuma decisionnan cu a haci cu den finanzas di SAC a conoce un sla duro. Pero DANKI ta bay na tur sponser cu a aporta na Carnaval 55 cual tabata e di 11 lustro, cu a haci posibel pa cubri gran parti di e situacion financiero cu SAC a confronta. Pero SAC ta spera cu den futuro tur partido traha hunto na bienestar di Aruba

su Carnaval.

SAC kier a gradici CEMT y yama bonbini na Rode Kruis cu kende aki un rato nos lo firma un acuerdo di cooperacion pa e proximo 5 aña di Carnaval.

Gradicimento Centro di Bario Lago Heights y tur cu a duna un man pa e luga a keda asina espectacular. Na su directiva completo y sigur un danki special pa Sr. Rufo Anthony, kende tabata tin na su encargo prepara e localidad pa ricibi nos publico.

SAC ta den deliberacion ainda pa loke ta algun facilidad pa Calypso y Roadmarch pa Carnaval 2010 pero ta spera di por keda cla pa final di november pa asina tur acuerdo por ta firma prome cu final di 2009.

Mi lo kier gradici Lotto pa Deporte cu uso di e facilidad di Aruba entertainment Center, cu a bira y ta keda "E cas di Carnaval".

Gradicimento ta bay Ministerio di Cultura di e gobierno anterior pa nan aporte cu tur e trofeonan pa e ultimo añanan y nos ta yama bonbini na nos Ministerio di Cultura nobo den persona di un ser femenino cu cual nos tin sigur di por conta cu continuacion cu e aporte aki y mas cu claro hopi mas.

Den Carnaval nr 56 Aruba lo celebra su di 15 reina Infantil. Nos no por keda sin menciona cu nos lo celebra tambe e di 40 Tumba Contest, cual e aña aki lo bay den un facilidad nobo cual ta Sport Boys. Di awor caba mi ta haci un yamada na pueblo di Aruba pa duna Tumba Contest e apoyo cu e mereci.

Mi ta yama un bon bini y un palabra di pabien ta bay na e gobierno nobo, y cu SAC tin sigur cu nos por conta riba nan apoyo mas cu 100% (hahahaha) Ya cu SAC ta sigur cu e cooperacion y aporte pa e celebracion cultural mas grandi cu Pais Aruba conoce cual ta nos dushi Carnaval lo haya e sosten DI MES!!!!

Mi ta spera cu SAC lo por haya un oido cerca e Gobierno nobo ya cu nos tin un Minister cu ta lider di un grupo di Carnaval y kende por conta cu no ta facil pa bo tin un gupo ya cu e gastonan ta halto. Mester yega nan insentivonan pa e Carnavalistanan pa asina nos por sigui mantene nos nivel cu Aruba a yega na top. Nos Carnaval ta un di esnan mas safe na mundo y nos mester mantene. Mi ta spera cu e porta di ofcinanan di tur Minister cu tin di haber cu

Carnaval ta habri pa ricibi SAC kende ta cla y dispuesto pa duna su presentacion di kico tur ta e tarea di SAC y kico tur ta loke Aruba su Carnaval ta biba y come. Nos ta spera pa no sosode loke a sosode den pasado caminda cu ta expresa cu lo invita SAC pa sinta na mesa pero despues di aña ta lubida riba e exprecion haci.

Pa loke ta Carnaval 56 SAC ta mira varios reto nos dilanti: Mester traha na yega na insentivo pa asina stimula mas grupo di mucha. Ya cu mucha y hoben ta e futuro di nos Pais y Carnaval. SAC ta sigui traha pa yega na fondonan necesario pa asina duna sosten na e gruponan di Carnaval ya cu no ta facil pa grupo yega na fondo financiero pa medio di sponser.

Pa e motibo aki SAC ta haci un yamada na comercio di Aruba pa habri boso curazon y duna boso aporte na Carnaval.

Ban tur hunto haci Carnaval 56 un carnaval caminda un y tur, nos tur por ta orguyoso di dje. No ban laga ningun obstáculo stroba e celebracion.

Ban tur pensa kico nos por haci pa mehora of kico por ta nos contribucion pa Aruba su Carnaval enbez di bira critica sin cu ta trece alternativa pa mehora y engrandece Aruba su Carnaval.

Corda bon Carnaval ta genera entrada pa SAC pero tur e entrada ta bay back den pagamento di tur e gastonan cu Carnaval ta trece cu ne. SAC su miembronan ta boluntario y nan ta haci e trabao cu amor. Corda bon: No puntra kico carnaval ta haci pa bo, pero kico abo ta haci pa conserva nos carnaval. E slogan pa Carnaval 56 No laga niun hende dañá bo beis den 56 y usa bo cabez den 2010!!